

PLEIV SUMVITG

Radunonza da pleiv 2021/01

Protocol

datum e temps	mardis, 25-05-2021, allas 20.00
liug	scola, Sumvitg
envidai	parochianas e parochianas pleiv Sumvitg
perstgisas	Alfonsina Vincenz, Surrein, Giusep Bearth, Sumvitg, Andrea e Valentin Schmed, Surrein, Daniela Wieland, Sumvitg, Iris Nwachukwi-Casanova, Rabius, Rita Schmed-Pelican, Surrein, Fabian Bearth, Rabius, Martina e Patrick Schaniel, Sumvitg, Vitus Bass, S. Benedetg, Doris Janka, Trun
presents	35
absolut pli	18

Tractandas

1	Beinvegni
2	Elecziun da 2 dumbravuschs
3	Approbaziun dil protocol dalla radunonza da pleiv dils 16-09-2020
4	Rapport dil president
5	Rapport dalla menadra dil cussegl pastoral
6	Presentaziun dil quen annual 2020
7	Rapport dils revisurs ed approbaziun dil quen 2020
8	Presentaziun ed approbaziun dil preventiv 2021
9	Fixaziun dil pei da taglia per 2022
10	Elecziun da sur Saji sco plevon dalla pleiv Sumvitg
11	Elecziun dil delegau e dalla suppleanta da delegada al Corpus catholicum
12	Tractaziun ed approbaziun dil project sanaziun externa dalla casa pervenda a Rabius e concessiun dil credit da frs. 390'000
13	Orientaziuns
14	Varia

1. Beinvegni

Il president Walter Deplazes arva la radunonza e beneventa ils presents.

La suprastonza propona dad amplificar la gliesta da tractandas cull'elecziun dil delegau e dalla suppleanta da delegada al Corpus catholicum sco tractanda 11. Quella elecziun ei ida en emblidanza cu la suprastonza ha fixau la gliesta da tractandas.

La gliesta da tractandas vegn approbada cun quell'amplificaziun.

2. Elecziun da 2 dumbravuschs

Sco dumbravuschs vegnan Alice Cajacob-Berther, Sumvitg e Roland Maissen, Rabijs proponi ed elegi.

3. Approbaziun dil protocol dalla radunonza da pleiv dils 16-09-2020

Il protocol dalla davosa radunonza da pleiv ei staus exponius en tuttas baselgias per investa e tgi che ha vuliu ha saviu prender in exemplar a casa.

Il protocol vegn approbaus unanimamein.

4. Rapport dil president

En siu extendiu e detagliau rapport lai il president Walter Deplazes repassar il curriu e passau duront igl onn vargau ed engrazia cordialmein a tuts involvai sin ina moda ni l'otra.

(Il rapport ei disponibels silla pagina d'internet www.pleivsumvitg.ch).

5. Rapport dalla menadra dil cussegl pastoral

La davosa radunonza da pleiv ha elegiu las commembras ed il commember dil cussegl pastoral. Ils nievelegi ein seradunai ed han elegiu ord lur miez Gabriela Lutz-Soliva da Rabijs sco nova menadra dil cussegl pastoral.

Sco Gabriela rapporta ha il cussegl pastoral muort la situaziun da corona saviu far practicamein nuot da quei ch'era previu. Per tuttina saver porscher enzatgei a parochianas e parochians, han ei tschentau duront il temps d'advent en las baselgias da mintga vitg impuls e historiettas per mintga di. Aschia ha in e scadin saviu far ina viseta en baselgia da tut temps. Plascheivlamein eis ei vegniu fatg stediamein diever, forsa era demai che biars vevan respect ni tema dad ir en baselgia duront ils survetschs divins. Plinavon han ei susteniu l'administratura Giuliana tier la recrutaziun da ministrantas e ministrants.

6. Presentaziun dil quen annual 2020

Il quen annual 2020 ei vegnius repartius a tuttas casadas da nossa pleiv.

L'administratura Giuliana Gienal presenta il quen culs detagls leutier.

Il quen siara cun in surpli d'entradas da frs. 31.60.

7. Rapport dils revisurs ed approvaziun dil quen 2020

La revisiun dil quen ei vegnida fatga da nossa cumissiun da gestiun dalla quala fan part:

- Cornelia Deplazes, Surrein,
- Thomas Bieler, Rabiun,
- Fabian Collenberg, Sumvitg.

Thomas Bieler presenta il rapport da revisiun e propona d'approbar il quen sco presentaus.

Il quen vegn approbaus unanimamein.

8. Presentaziun ed approvaziun dil preventiv 2021

L'administratura Giuliana Gienal presenta il preventiv 2021.

Il quen current preveda in surpli d'entradas da frs. 2'868.00

Il preventiv dil quen current per igl onn 2021 vegn approbaus unanimamein.

9. Fixaziun dil pei da taglia 2022

La suprastonza propona da fixar il pei da taglia pigl onn 2022 sco tochen dacheu sin 18 % dalla taglia sempla dil cantun.

La proposta dalla suprastonza vegn approbada unanimamein.

10. Elecziun da sur Saji sco plevon dalla pleiv Sumvitg

Ils 11 d'avrel 2017 ha la suprastonza da pleiv elegiu sur Saji sco plevon administratur dalla pleiv Sumvitg. Sur Saji ha il zercladur da quei onn lu terminau siu studi a Ruma cul doctorat ed ha suenter in tempset en Tiaratudestga entschiet il settember 2017 sia lavur da plevon en nossa pleiv. Ins sa senza dubi dir che sur Saji ei sevivius en fetg bein tier nus.

Las parochianas ed ils parochians schazegian el fetg e sia lavur vegn apprezzada da tuttas varts. Gest el temps da corona ha el mussau ch'el ha era in bien maun per la tecnica moderna.

Aschia ha el procurau ch'ils survetschs divins han saviu vegnir emess directamein a casa en quei temps cun restricziuns muort la pandemia. Quella purschida vegn beneventada lunsch sur las scheinas da nossa pleiv ora. Ussa ei il mument arrivaus nua che la pleiv duei eleger sur Saji sco siu plevon. La suprastonza ha perquei era fatg la damonda corrispundenta agl uestgiu ed ha survegniu il consentiment d'uestg Joseph Maria Bonnemain dad eleger sur Saji sco plevon dalla pleiv Sumvitg.

Suenter nossa elecziun vegn igl uestgiu lu a tschentar ora il document d'elecziun uffical per sur Saji.

La fiasta d'installaziun da sur Saji vegn fatga entras il decan sur Thomas Drwal, plevon da Trun. Quella duei haver liug cu las restricziuns en baselgia muort la pandemia ein sligiadas si.

Sur Saji Vellavoor vegn elegius unanimamein sco plevon dalla pleiv Sumvitg .

11. Elecziun dil delegau e dalla suppleanta da delegada al Corpus catholicum

Uonn crodan las elecziuns dallas delegadas e dils delegai e dallas suppleantas e dils suppleants da delegai el parlament dil Corpus catholicum, dalla Baselia catolica Grischuna e quei per la perioda da legislatura 2021-2025.

Las pleivs dalla Cadi san tarmetter 4 delegadas ni delegai al Corpus catholicum e per mintga delegada ni delegau dat ei ina ni in suppleant.

Delegai e suppleants ein reparti mintgamai 2 per Sur- e 2 per Sutsassiala.

La cuvegna vertenta che ei vegnida revedida igl onn 2017 regla tgei pleiv che sa delegar cu ina delegada ni in delegau resp. ina suppleanta ni in suppleant.

La davosa perioda da legislatura ei Armin Candinas staus delegau da nossa pleiv al Corpus catholicum. Suppleanta ni suppleant havein nus giu negin.

Tenor turnus sa la pleiv Sumvitg tarmetter per la legislatura 2021-2025 ina delegada ni in delegau e la secunda ni il secund suppleant per Sutsassiala.

La suprazonza propona dad eleger el parlament dil Corpus catholicum:

- igl actuar Armin Candinas sco **delegau** e
- l'administratura Giuliana Gienal sco **secunda suppleanta** per Sutsassiala.

Ils dus proponi vegnan elegi unanimamein.

12. Tractaziun ed aprobaziun dil project sanaziun externa dalla casa pervenda a Rabius e concessiun dil credit da frs. 390'000

La casa pervenda da Rabius ei vegnida baghegiada igl onn 1970, els onns nua che la damonda pertuccont l'isolaziun da baghetgs steva buca aschi el center sco ozildi.

Igl onn 2012 ein las finiastras vegnidas remplazzadas ed igl atun 2018 il scaldament central dad ieli.

Ils gronds cuosts annuals d'energia ed il fatg che la casa pervenda sa igl unviern da ferdaglia strusch vegnir scaldada endretg, ein bunas raschuns daco che la casa duei vegnir sanada ordadora cun isolar las preits ed il tetg tenor las prescripziuns vertentas. Aschia san era las fatschadas che sepresentan gia en vestgiu ualti vegl culla ligiadira che dat tscheu e leu naven, gest era vegnir frestgentadas si. Cun ina tala sanaziun san ils cuosts da scaldament vegnir reduci essenzialmein.

La suprastanza ha surdau alla firma Simeon Baumanagement da Trun l'incarica da planisaziun e direcziun dallas lavurs per la sanaziun externa dalla casa pervenda da Rabius. Ensemen cun in expert da fisica dil baghetg ein las lavurs da sanaziun vegnidas definidas ed ils cuosts persunter calculai.

Tenor la detagliada calculaziun sto vegnir quintau cun cuosts totals da 390'000 francs.

Il project per la sanaziun externa dalla casa pervenda Rabius ed il credit brut da 390'000 francs vegnan approvai unanimamein.

13. Orientaziuns

1. Fiastas da baselgia

La fiasta da **Sogn Mudest** vegn muort las restricziuns actualas festivada en rama dil survetsch divin dalla dumengia cun metter ora il sogn sper igl altar grond.

Sontgilcrest ha liug en mintga liug da baselgia cun messa e cun veneraziun dil Sontgissim tenor sur Saji.

Las fiastas da perdanonza da **Rabius e Surrein** han, sche las restricziuns lubeschan quei, liug sco usitau.

La **sontga Creisma 2022** ha liug la sonda, ils 23 d'avrel 2022, il di avon dumengi'alva, cun uestg Joseph Maria Bonnemain. Agl uestg va mo quei termin e la suprastanza ei dil meini che sunter in veramein liung temps fuss ei bi da puspei haver igl uestg per la sontga Creisma.

2. Cudischs dall'anteriura pleiv Sumvitg

Ils onns 2016/2017 ha Aluis Maissen da Rabius transscret ils cudischs parochials dalla pleiv da Sumvitg dils onns 1639 entochen 1838, pia sur 200 onns.

La finala ha ei dau 7 toms cun 4 cudischs da batten, 1 cudisch da nozzas e 2 cudischs da defuncts. L'ovra stampada cun 666 paginas ei in enorm scazzi per nosa pleiv, san ils cudischs ussa aschia gie vegnir perscrutai da mintgin da nus che ha interess dad intervegnir dapli da ses antenats.

La pleiv ha acquistau dus exemplars, in ei egl archiv dalla pleiv a Sumvitg e l'auter ei tiel president dalla pleiv. Interessents san s'annunziar tiel president.

En num dalla pleiv Sumvitg admetta il president in grond engraziament ad Aluis Maissen per quella immensa e preziosa lavur.

14. Varia

Sur Saji engrazia per sia elecziun sco plevon. Era sche quell'elecziun mida nuot vid sia lavur da pastoraziun ha el grond plascher da quei segn da beinvulientscha. El engrazia era a tut che segida sin ina moda ni l'autra ella pastoraziun.

Giuanna Albin-Pelican sedamonda co ils parochains san egl avegnir prender aua benedida. Ella propona d'aquistar in cundrez corrispundent a quel da desinfectar ils mauns avon ch'entrar en baselgia.

Rabius, 29-05-2021

Igl actuar
Armin Candinas

il president
Walter Deplazes